

EQIKKARNERA

Kalallit Nunaanni Pinerluttulerinermik inatsisip aamma eqqartuussisarnermik inatsisip allanngortinneqarnissaat pillugu inatsisissatut siunnersuummut missingiut (kinguaassiuutitigut pinerluttarnerit il.il.)

Pillaasarneq pillugu inatsisip il.il allanngortinneqarnissaa pillugu inatsit nr. 633 juunip 12.-anni 2013-imeersukkut danskit pillaasarneq pillugu inatsisaanni kapitali 24 kinguaassiuutitigut pinerluttarnermut tunngasoq annertuumik allanngortinneqarpoq.

Kalaallit Nunaanni Eqqartuussisarneq pillugu Siunnersuisoqatigiit 2016-imi ataatsimiinnermini aalajangerput kinguaassiuutitigut atornerluineq pillugu maleruagassaasa danskit maleruagassaat sapinngisamik assigissagaat.

Inatsisinik Atuutsitsinermut Ministereqarfup tamanna tunngavigalugu Kalallit Nunaanni Pinerluttulerinermik inatsisip aamma eqqartuussisarnermik inatsisip allanngortinneqarnissaat pillugu inatsisissatut siunnersuummut missingiut ilanngunneqartoq suliaraa.

Kinguaassiuutitigiut pinerluutit pillugit pinerluttulerinermik inatsimmi maleruagassat nalinginnaasumik nutarterneqarnissaat inatsisissatut siunnersuutikkut piviusunngortinniarneqarpoq. Taamaalilluni ilaqqatut qanigilluinnakkamik atoqateqarneq pillugu malittarisassat annertusineqarnissaat inatsisissatut siunnersuutip kingunerissavaa, qitornavissiat taakkualu kinguaavi ilaalerlutik, aamma kinguaassiuutitigut pinerlunnerit pillugit malittarisassat katissimanngisamut iliuuserisimasanut tunngasut annertusineqassapput katissimasamut iliuuserinninnerit ilaalersinneqarlutik. Aammattaaq ilaatigut siunnersuutigineqarpoq arnerisitsineq/anguserisitsineq pillugu malittarisassaq nutamik oqaasertalerneqassasoq.

Pillaasarneq pillugu inatsimmi allannguutit, inatsit nr. 319, 28. april 2009-meersukkut atulersinneqartut ilaat inatsisissatut siunnersuutikkut piviusunngortinneqarput. Taamaasilluni inuup 18-it inorlugit ukioqartup pornografiimik takutitsinermut peqataaneranut aamma taamatut takutitsinermut najuunneranut peqataanerup pinerlunninngortitsinissaq siunnersuutip ilaatigut imaraa.

Kiisalu suliani inunnik niuffateqarnermut tunngasuni illersuisumik ivertitsisinnaanissaq Kalaallit Nunaanni eqqartuussisarneq pillugu inatsimmut ilanngunneqarnissaanik siunnersuut inatsisissatut

siunnersuummut ilaavoq.

Suliassaqarfinni pineqartuni suliassat qanoq annertutigigaluarnersumik amerlinerannik inatsisissatut siunnersuutip kinguneqarnissaa naatsorsuutigineqarpoq.